

四庫全書

集部

欽定四庫全書

集部

石倉歷代詩選卷五十九
六十

詳校官庶吉士臣范逢恩

侍讀臣孫球覆勘

總校官進士臣朱鈐

校對官主事臣張慎和

謄錄監生臣周鴻

欽定四庫全書

石倉歷代詩選卷五十九

明 曹學佺 編

中唐十三

張籍

字文昌
蘇州人

宛轉行

華屋重翠幄綺席雕象牀
遠漏微更疎薄衾中夜涼
爐氣暗徘徊寒燈背斜光
妍姿結宵態寢覺幽夢長
宛轉

復宛轉憶君更未央

懷友

人生有行役誰能如草木別離感中懷乃為我桎梏百
年受命短光景良不足念我別離者願懷日月促平地
施道路車馬往不復空知為良田秋望禾黍熟端居無
儔侶日夜禱耳目立身難自覺常恐憂與辱窮賤無閒
暇疾病多嗜慾我思携手人逍遙任心腹

夜懷

窮居積遠念轉轉迷所歸幽蕙零落色暗螢參差飛病
生秋風簟淚墮明月衣無愁坐寂寞重使奏清徽

野居

貧賤易為適荒郊亦安居端坐無餘思彌樂古人書秋
田多良苗野水多遊魚我無耒與網安得充廩厨寒天
白日短簷下煖我軀四肢漸寬柔中腸鬱不舒多病減
志氣為客足憂虞況復時節晚覽景獨踟躕

西州

羌胡據西州近甸無邊城山東收稅租養我防塞兵胡
騎來無時居人常震驚嗟我五陵間農者罷耘耕邊頭
多殺傷士卒難全形郡縣發丁役丈夫各征行生男不
能養懼身有姓名良馬不念秣烈士不苟營所願除國
難再逢天下平

離怨

切切重切切秋風桂枝折人當少年嫁我當少年別念
君非征行年年長遠途妾身甘獨歿高堂有舅姑山川

豈遙遠行人自不返

寄遠曲

美人來去春江暖江頭無人湘水滿浣紗石上水禽栖
江南路長春日短蘭舟桂楫常渡江無因重寄雙瓊瑤

行路難

湘東行人長嘆息十年離家歸未得弊裘羸馬苦難行
僮僕饑寒少筋力君不見牀頭黃金盡壯士無顏色龍
燭泥中未有雲不能生彼升天翼

征婦怨

九月匈奴殺邊將漢軍全沒遼水上
萬里無人收白骨
家家城下招魂葬
婦人依倚子與夫
同居貧賤心亦舒
夫死戰場子在腹
妾身雖存如畫燭

寄衣曲

織素縫衣獨苦辛
遠因回使寄征人
官家亦自寄衣去
貴從妾手着君身
高堂姑老無侍子
不得自到邊城裏
慙慙為看初着時
征夫身上宜不宜

送遠曲

戲馬臺南山簇簇山邊飲酒歌別曲行人醉後起登車
席上回尊勸僮僕青天漫漫覆長路遠遊無家安得住
願君到處自題名他日知君從此去

築城詞

築城處千人萬人抱把杵重重土堅試行錐軍吏執鞭
催作遲來時一年深磧裏盡着短衣渴無水力盡不得
休杵聲杵聲未定人皆死家家養男當門戶今日作君

城下土

猛虎行

南山北山樹冥冥猛虎白日繞林行向晚一身當道食
山中麋鹿盡無聲年年養子在空谷雌雄上山不相逐
谷中近窟有山林長向村家取黃犢五陵年少不敢射
空來林下看行迹

別離曲

行人結束出門去幾時更踏門前路憶昔君初納采時

不言身屬遼陽戍
早知今日當別離
成君家計良為誰
男兒生身自有役
那得誤我少年時
不如逐君征戰死
誰能獨老空閨裏

求仙行

漢皇欲作飛仙子
年年採藥東海裏
蓬萊無路海無邊
方士舟中相枕死
招搖在天迴
白日甘泉玉樹無仙實
九皇真人終不下
空向離宮祠太乙
丹田有氣凝素華
君能保之昇絳霞

古釵嘆

古釵墮井無顏色百尺泥中今復得鳳凰宛轉有古儀
欲為首飾不稱時女伴傳看不知主羅袖拂拭生光輝
蘭膏已盡股半折雕文刻樣無年月雖離井底入匣中
不用還與墮時同

各東西

遊人別一東復一西出門相背兩不返惟信車輪與馬
蹄道路悠悠不知處山高海濶誰辛苦遠遊不定難寄

書日日空尋別時語浮雲上天雨墮地暫時會合終離
異我今與子非一身安得死生不相棄

節婦吟

君知妾有夫贈妾雙明珠感君纏綿意繫在紅羅襦妾
家高樓連苑起良人執戟明光裏知君用心如日月事
夫誓擬同生死還君明珠雙淚垂何不相逢未嫁時

讌客詞

上客不用顧金羈主人有酒君莫違請君看取園中花

地上漸多枝上稀
山頭樹影不見石溪水無風映更碧
人人齊醉起舞時
誰覺翻衣與倒幘
明朝花盡人已去
此地獨來空繞樹

傷歌行

黃門詔下促收捕
京兆尹繫御史府出門無復部曲隨
親戚相逢不容語
辭成謫尉南海州受命不得湏臾留
身着青衫騎惡馬
東門之外無送者
邨夫防吏急喧驅
往往驚墮馬蹄下
長安里中荒大宅
朱門已除十二戟

高堂舞榭鏤管絃美人遙望西南天

吳宮怨

吳宮四面秋江水江清露白芙蓉死吳王醉後欲更衣
座上美人嬌不起宮中千門復萬戶君恩反復誰能數
君心與妾既不同徒向君前作歌舞茱萸滿宮紅實垂
秋風娟娟生繁枝姑蘇臺上夕燕罷他人待寢還獨歸
白日在天光在地君今那得長相棄

北邙行

洛陽北門北邙道喪車轡轡入秋草車前齊唱薤露歌
高墳新起日峨峨朝朝暮暮人送葬洛陽城中人更多
千金立碑高百尺終作誰家柱下石山頭松栢半無主
地下白骨多於土寒食家家送紙錢烏鳶作巢銜上樹
人居朝市未解愁請君暫向北邙遊

關山月

秋月明朗關山上山中行人馬蹄響關山秋來雨雪多
行人見月唱邊歌海邊茫茫天氣白胡兒夜度黃龍磧

軍中探騎暮出城伏兵暗處低旌戟沙磧連天霜草平
野駝尋水磧中鳴隴頭風急鴈不下沙場苦戰多流星
可憐萬里關山道年年戰骨多秋草

少年行

少年從獵出長楊禁中新拜羽林郎獨到輦前射雙虎
君王手賜黃金璫日日闕雞都市裏贏得寶刀重刻字
百里報讐夜出城平明還在娼樓醉遙聞虜到平陵下
不待詔書行上馬斬得名王獻桂宮封侯起第一日中

不同六郡良家子百戰始取邊城功

白頭吟

請君膝上琴彈我白頭吟憶昔君前嬌笑語兩情宛轉
如縈素宮中為我起高樓更開花池種芳樹春天百草
秋始衰棄我不待白頭時羅襦玉珥色未暗今朝已道
不相宜楊州青銅作明鏡暗中持照不見影人心回互
自無窮眼前好惡那能定君恩已去若再返菖蒲花開
月長滿

羈旅行

遠客出門行路難
停車斂策在門端
荒城無人霜滿路
野火焚橋不得度
寒蟲入窟鳥歸巢
僮僕問我誰家去
行尋田頭暝未息
雙轂長轅礙荆棘
綠岡入澗投田家
主人舂米為夜食
晨雞喔喔茆屋傍
行人起掃車上霜
舊山已別行已遠
身計未成難復返
長安陌上相識稀
遙望天門白日晚
誰能聽我辛苦行為向君前歌一聲

妾薄命

薄命嫁得良家子無事從軍去萬里漢家天子平四夷
護羌都尉裹屍歸念君此行為死別對君裁縫泉下衣
與君一日為夫婦千年萬歲亦相守君愛龍城征戰功
妾願青樓歌樂同人生各各有所欲詎得將心入君腹

楚宮行

章華宮中九月時桂花未落紅橘垂江頭騎火照輦道
君王夜從雲夢歸霓旌鳳蓋到雙闕臺上重重歌吹發
千門萬戶開相當燭籠左右列成行下輦更衣入洞房

洞房侍女盡焚香玉階羅幃微有霜齊言此夕樂未央
玉酒湛湛盈華觴絲竹次第鳴中堂已姬起舞向君王
迴身垂手結明璫願君千年萬年壽朝出射麋夜飲酒

白紵歌

皎皎白紵白且鮮將作春衣稱少年裁縫長短不能定
自持刀尺向姑前復恐蘭膏汗纖指常遣傍人收墮珥
衣裳着時寒食下還把玉鞭鞭白馬

牧童詞

遠牧牛遶村四面禾黍稠陂中饑鳥啄牛背令我不得
戲壠頭入陂草多牛散行白犢時向蘆中鳴隔堤吹葉
應同伴還鼓長鞭三四聲牛羣食草莫相觸官家截爾
頭上角

沙上行呈裴相公

長安大道沙為堤早風無塵晚無泥宮中玉漏下三刻
朱衣導騎丞相來路傍高樓息歌吹千車不行行者避
街官閭吏相傳呼宮前十里惟空衢白麻詔下移相印

新堤未成舊堤盡

永嘉行

黃頭鮮卑入洛陽胡兒持戟升明堂晉家天子作降虜
公卿齊走如牛羊紫陌旌旛暗相觸家家雞犬驚上屋
妾今出門隨亂兵夫死眼前不敢哭九州諸侯自顧土
無人領兵來護主北人避胡多在南南人至今能晉語

採蓮曲

秋江岸邊蓮子多採蓮女兒凭船歌青房圓實齊戢戢

爭前競折漾微波試妝綠莖下尋藕斷處絲多刺傷手
白練束腰袖半卷不插玉釵牽梳淺船中未滿度前洲
借問阿誰家住遠歸時共待暮潮上自弄芙蓉還蕩漿

賈客樂

金陵向西賈客多船中生長樂風波欲發移船近江口
船頭祭神各澆酒停杯共說遠行期入蜀經蠻誰別離
金多衆中為上客夜夜算緡眠獨遲秋江初月猩猩語
孤帆夜發瀟湘渚水工持楫防暗灘直過山邊及前侶

年年逐利西復東姓名不在縣籍中
農夫稅多長辛苦棄業寧為販寶翁

江南曲

江南人家多橘樹吳姬舟上織白苧
土地卑濕饒蟲蛇連木為簰入江住
江村亥日長為市落帆度橋來浦裏
青莎覆城竹為屋無井家家飲潮水
長干午日沽春酒高高酒旗懸江口
娼樓兩岸懸水柵夜唱竹枝留北客
江南風土懽樂多悠悠處處盡經過

薊北旅思

日日望鄉國空歌白苧詞長因送人處憶得別家時失意還獨語多愁祇自知客亭門外柳析盡向南枝

江南春

江南楊柳春日暖地無塵渡口過新雨夜來生白蘋晴沙鳴乳燕芳樹醉遊人向晚青山下誰家祭水神

西樓望月

城西樓上月復是雪晴時寒夜共來望思鄉獨下遲幽

光落水塹淨色遍霜枝明日千里去此中還別離

山中古祠

春草空祠墓荒林唯鳥飛記年碑石在經亂祭人稀
野鼠緣朱帳陰塵蓋盡衣近來潭水黑時見宿龍歸

漁陽將

塞深沙草白都護領燕兵放火燒奚帳分旗築漢城
下營看嶺勢尋雪覺人行更向桑乾北擒生問磧名

送南遷客

去去遠遷客
瘴中衰病身
青山無限路
白首不歸人
海國戰騎象
蠻州市用銀
一家分幾處
誰見日南春

薊北春懷

渺渺水雲外
別來信音稀
因逢過江使
却寄在家衣
問路更愁遠
逢人空說歸
今朝薊城北
又見塞鴻飛

贈同谿客

幽居得相近
煙景每寥寥
共伐臨谿樹
同為過水橋
自教青鶴舞
分採紫芝苗
更愛南峰住
尋君路恐遙

望行人

秋風窓下起旅鴈向南飛
日日出門望家家行客歸
無因見邊使空待寄寒衣
獨倚青樓暮煙深鳥雀稀

送越客

見說孤帆去東南到會稽
春雲剡溪口殘月鏡湖西
水鶴沙邊立山艸竹裏啼
謝家曾住處煙洞入應迷

夜到漁家

漁家在江口潮水入柴扉
行客欲投宿主人猶未歸
竹

深村路遠月出釣船稀遙見尋沙岸春風動草衣

宿臨江驛

楚驛南渡口夜深來客稀月明見潮上江靜覺鷗飛旅
宿今已遠此行猶未歸離家久無信又聽搗寒衣

送蠻客

借問炎州客天南幾日行江連惡谿路山遶夜郎城柳
葉瘴雲濕桂叢蠻鳥聲知君却迴日記得梅花名

送遠客

南原相送處秋水草還生同作憶鄉客如今分路行因
誰寄歸信漸遠問前程明日重陽節無人上古城

上國贈日南僧

獨向雙峰老松門閉兩涯翻經依貝葉掛衲落藤花梵
石新開井穿林自種茶時逢海南客蠻語問誰家

征西將

黃沙北風起半夜又翻營戰馬雪中宿探人冰上行深
山旗未展陰磧鼓無聲幾道征西將同收碎葉城

山中秋夜

寂寂山景靜幽人歸去遲
橫琴當月下壓酒及花時
冷露濕茆屋暗泉衝竹籬
西峰採藥伴此夕恨無期

宿江店

野店臨西浦門前有橘花
停燈待賈客賣酒與漁家
夜靜江水白路迴山月斜
閒尋泊船處潮落見平沙

嶺外逢故人

過嶺萬餘里旅遊經此稀
相逢去家遠共說幾時歸
海

上見花發瘴中唯鳥飛炎州望鄉伴自識北人衣

寄紫閣隱者

紫閣氣沉沉先生住處深有人時得見無路可相尋
夜鹿伴茅屋秋猿守栗林唯應採靈藥更不別營心

夜宿黑黿谿

夜到碧谿裏無人秋月明逢幽更移宿取伴亦探行
花下紅泉色雲西乳鶴聲明朝記歸處石上自書名

送友人歸山

出山成北首重去結茅廬移石修廢井掃龕盛舊書開
田留杏樹分洞與僧居長在幽峰裏樵人見亦踈

雪溪西亭晚望

雪水碧悠悠西亭柳岸頭夕陰生遠岫斜照逐迴流此
地動歸思逢人方倦遊吳興耆舊盡空見白蘋洲

送新羅使

萬里為朝使離家今幾年應知舊行路却上遠歸船夜
泊避蛟窟朝炊求島泉悠悠到鄉國還望海西天

宿廣德寺寄從舅

古寺客堂空開簾四面風移牀動栖鴿停燭聚飛蟲聞
卧逐涼處遠愁生靜中林西微月色思與甯家同

酬裴僕射朝回寄韓吏部

獨愛南關裏山晴竹杪風從容朝早退瀟洒客常通按
曲新亭上移花遠寺中惟應有吏部詩酒每相同

送嚴大夫之桂州

旌旆過湘潭幽奇得徧探蒞城百越北行路九疑南有

地多生桂無時不養蠶聽歌難辨曲風俗自相諳

贈海東僧

別家行萬里自說過扶餘學得中州語能為外國書依
方收海藻持呪取龍魚更問同來伴天台幾處居

寄漢陽故人

知君漢陽住煙樹遠重重歸使雨中發寄書燈下封同
時買江塢今日別雲松欲問新移室青蘿最北峰

送安西將

萬里海西路茫茫邊草秋計程沙塞口望伴驛峰頭雪
暗非時宿沙深獨去愁塞鄉人易老莫住近番州

題李山人幽居

襄陽南郭外茅屋一書生無事焚香坐有時尋竹行畫
苔藤杖細踏石筍鞋輕應笑風塵客區區逐世名

早春閒遊

年長身多病偏宜作冷官從來閒坐慣漸覺出門難樹
影新猶薄池光晚尚寒遙聞有花發騎馬暫行看

和左司元郎中秋居

自知清靜好不要問時豪就石安琴枕穿松厭酒槽山
情因月甚詩語入秋高身外無餘事唯應筆硯勞

經王處士原居

舊宅誰相近唯僧近竹闌庭間雲滿井窓曉雪通山來
客半留宿借書多寄還明時未中歲莫便一生閒

沒蕃故人

前年討月支城上沒全師蕃漢斷消息死生長別離無

人收廢帳歸馬識殘旗欲祭疑君在天涯哭此時

送流人

獨向長城北黃雲暗塞天流名屬邊將舊業作公田擁
雪添軍壘收冰當井泉知君住應老須記別鄉年

襄國別友

曉色荒城下相看秋草時獨遊無定計不欲道來期別
處去家遠愁中驅馬遲歸人渡煙水遙映野棠枝

送南客

行路雨脩脩青山盡海頭天涯人去遠嶺北水空流夜
市連銅柱巢居屬象州來時舊相識誰向日南遊

送閩僧

幾夏京城住今朝獨遠歸修行四分律護淨七條衣谿
寺黃橙熟沙田紫芋肥九龍潭上路同去客應稀

過賈島野居

青門坊外住行坐見南山此地去人遠知君終日間蛙
聲籬落下草色戶庭間好是經過處惟愁暮獨還

送僧遊五臺兼謁李司空

遠去見雙節因行上五臺
化樓侵曉出雪路向春開
邊寺連烽去胡兒聽法來
定知巡禮後解夏始應迴

送李評事遊越

未習風塵事初為吳越遊
露沾湖草濕日照海山秋
梅市門何在蘭亭水尚流
西陵待潮處知汝不勝愁

憶盧常侍寄華山鄭隱者

獨住三峰下年深學煉丹
一間松葉屋數片石花冠
酒

待山中飲琴將洞裏彈開門移遠竹剪草出幽蘭荒壁
通泉架晴崖曬藥壇寄知騎省客長向白雲看

送鄭尚書出鎮南海

遠鎮承新命王程不假催班行爭路送恩賜併時來牙
旂從城展兵符到府開蠻聲喧夜市海色浸潮臺畫角
天邊月寒關嶺上梅共知公望重多是隔年迴

贈梅處士

早聞聲價滿京城頭白江湖放曠情講易自傳新註義

題詩不著舊官名
近移馬跡山前住
多向牛頭寺裏行
天子如今議封禪
應將束帛請先生

早朝寄白舍人嚴郎中

鼓聲初動未聞雞
羸馬街中踏凍泥
燭暗有時衝石柱
雪深無處認沙堤
常叅班裏人猶少
待漏房前月欲西
鳳闕星郎離去遠
金門開處入還齊

題韋郎中新亭

起得幽亭景最新
碧沙池上更無塵
琴書看盡猶嫌少

松竹栽多亦稱貧名酒欲開期好客朝衣暫脫見閒身
成名同日官連署此處經過有幾人

送楊州判官

應得煙霞出俗心茆山道士共追尋閒憐鶴貌偏能畫
暗辨桐聲自作琴長嘯每來松下坐新詩堪向雪中吟
征南幕裏多賓客君獨相知較最深

贈王祕書

早在山東聲價遠曾將奇策佐嫖姚賦來詩句無閒語

老去官班未
在朝身屈祇聞詞客歎家貧
多見野僧招
獨從書閣歸時晚
春水渠邊看柳條

贈賈島

籬落荒涼僮僕饑
樂遊原上住多時
蹇驢放飽騎將出
秋卷裝成寄與誰
拄杖傍田尋野菜
封書乞米趁時炊
姓名未上登科記
身屈惟應內史知

送韓侍御歸山

聞君久卧在雲間
為佐嫖姚未得還
新結茆廬招隱士

獨騎驄馬入深山九靈洞口行應到五粒松枝醉亦攀
明日河聲出城去家僮不復掃柴關

送楊少尹赴蒲城

官為本府當身榮因得還鄉任野情自廢田園今作主
每逢耆老不呼名舊遊寺裏僧應識新別橋邊樹已成
公事況閒詩更好筆牀携去上山行

寄和州劉使君

別離已久猶為郡閒向春風倒酒餅送客將過沙口堰

看花多上水心亭曉來江氣連城白雨後山光滿郭青
到此詩情應更遠醉中高詠有誰聽

贈李杭州

仙郎白首未歸朝應為蒼生領六條惠化州人久清淨
高情野鶴共逍遙竹間虛館無朝訟山畔青田長夏苗
終日政閒惟獨坐開門長望浙江潮

寄蘇州白二十三使君

三朝出入紫微臣頭白金章未在身登第早年同座主

題詩今日異州人
閭門柳色煙中遠
茂苑鶯聲雨後新
此處吟詩向山寺
知君忘却曲江春

送稽亭山寺僧

師住稽亭高處寺
斜廊曲閣倚雲開
山門十里松間入
泉澗三重洞裏來
名岳尋遊今已徧
佳城禮謁便應回
舊房到日閒吟後
林下還登說法臺

送汀州元使君

曾成趙北歸朝計
因拜王門最好官
為郡暫辭雙鳳闕

全家遠過九龍灘
山鄉祇有輸蕉戶
水鎮應多養鴨欄
地僻尋常來客少
刺桐花發共誰看

宿雲亭

清淨當深處
虛明向遠開
卷簾無俗客
應只見雲來

梅溪

自愛新梅好
行尋一徑斜
不教人掃石
恐損落來花

茶嶺

紫芽連白蘂
初向嶺頭生
自看家人摘
尋常觸露行

竹巖

獨入千竿裏綠巖踏石層筍頭齊欲出更不許人登

寄西峰僧

松暗水涓涓夜涼人未眠西峰月猶在遙憶草堂前

禪師

獨在西峰頂年年閉石房定中無弟子人到為焚香

涇州塞

行道涇州塞惟聞羌戍聲道邊古雙堠猶記向安西

野田

漠漠野田草
草中牛羊道
古墓無子孫
白楊不得老

岸花

可憐岸邊樹
紅蕊發青條
東風吹渡水
衝著木蘭橈

送蜀客

蜀客南行祭
碧雞木綿花
發錦江西山
橋日晚行人
少時見猩猩
樹上啼

送元結

昔日同遊潭水邊如今重說恨綿綿天涯相見還離別
客路秋風又幾年

蠻州

瘴水蠻中入洞流人家多住竹棚頭一山直上無城郭
惟見松牌記象州

與賈島閒遊

水北原南草色新雪消風暖不生塵城中車馬應無數
解得閒行有幾人

哭孟寂

曲江院裏題名處十九人中最少年今日春光君不見
杏花零落寺門前

送蕭遠弟

街北槐花傍馬蹄病身相送出門遲與君別後秋風夜
拈得新詩說向誰

送許處士

高情自與俗人疎獨向藍谿僻處居會到白雲長取醉

可能窓下讀閒書

送睢師

九星臺下煎茶別五老峰頭覓寺居
吟得新詩旋相寄
人來請莫達空書

憶故州

累石為山伴野夫
自收靈藥讀仙書
如今身是他州客
每見青山憶舊居

送客遊蜀

行盡青山到益州錦城樓下二江流
杜家曾向此中住
為到浣花谿水頭

感春

遠客悠悠任病身誰家池上又逢春
明年各自東西去
此地看花是別人

別客

青山歷歷水悠悠今日相逢明日秋
繫馬城邊楊柳樹
為君沽酒暫淹留

法雄寺東樓

汾陽舊宅今為寺，猶有當時歌舞樓。
四十年來車馬絕，古槐深巷暮蟬愁。

寄故人

靜曲閒房病客居，蟬聲滿樹槿花疎。
故人祇在藍田縣，強半年來未得書。

隣婦哭征夫

雙鬟初合便分離，萬里征夫不得隨。
今日軍回身已歿，

去時鞍馬別人騎

同韋員外開元觀尋時道士

觀裏初晴竹樹涼
閒行共到最高房
昨來官罷無生計
欲就師求斷穀方

重陽日至峽道

無限青山行已盡
迴看忽覺遠離家
逢高欲飲重陽酒
山菊今朝未有花

秋思

洛陽城裏見秋風欲作歸書意萬重復恐匆匆說不盡
行人臨發又開封

憶遠

行人猶未有歸期萬里初程日暮時惟愛門前雙柳樹
枝枝葉葉不相離

玉仙館

長谿新雨色如泥野水陰雲盡向西楚客天南行漸遠
山山樹裏鷓鴣啼

張蕭遠雪夜同宿

數卷新遊蜀地詩
長安僻巷得相隨
草堂雪夜攜琴宿
說似青城館裏時

涼州詞

鳳林關裏水東流
白草黃榆六十秋
邊將皆承主恩澤
無人解道取涼州

華清宮

溫泉流入漢離宮
宮樹行行浴殿空
武帝時人今欲盡

青山空閉御牆中

寄李渤

五度谿頭躑躅紅
高陽寺裏講時鐘
春山處處行應好
一月看花到幾峰

尋仙

谿頭一徑入青崖
處處仙居隔杏花
更見峰西幽客說
雲中猶有兩三家

同白侍郎杏園贈劉郎中

一去瀟湘頭已白
今朝始見杏花春
從來遷客應無數
重到花前有幾人

題僧院

聞師行講青龍院
本寺往來多少年
靜掃空房惟獨坐
千莖秋竹在簷前

吳歌詞

庭前春鳥啄林聲
紅夾羅襦縫未成
今朝社日停針線
起向朱櫻樹下行

逢賈島

僧房逢著款冬花
出寺行吟日已斜
十二街中春雪遍
馬蹄今去入誰家

楚妃怨

梧桐葉下黃金井
橫架輓轡牽素綆
美人初起天未明
手拂銀瓶秋水冷

離宮怨

高堂別館連湘渚
長向春光開萬戶
荆王去去不復來

宮中美人自歌舞

成都曲

錦江近西煙水綠
新雨山頭荔枝熟
萬里橋邊多酒家
遊人愛向誰家宿

寒塘曲

寒塘沈沈柳葉疎
水暗人語驚栖鳬
舟中少年醉不起
持燭照水射遊魚

春別曲

長江春水綠堪染蓮葉出水大如錢江頭橘樹君自種
那不長繫木蘭船

臺城

臺城六代競豪華結綺臨春事最奢萬戶千門成野草
祇緣一曲後庭花

春詞

新妝面面下朱樓深鎖春光一院愁行到中庭數花朵
蜻蜓飛上玉搔頭

傷愚溪

柳門竹巷依依在野草青苔日日多縱有鄰人解吹笛
山陽舊侶更誰過

其二

溪水悠悠春自來草堂無主燕飛回隔簾惟見中庭草
一樹山榴依舊開

聽舊宮人穆氏唱歌

曾隨織女渡天河記得雲間第一歌休唱貞元供奉曲

當時朝士已無多

楊柳枝詞

煬帝行宮汴水濱
數株殘柳不勝春
晚來風起花如雪
飛入宮牆不見人

宿都庭有懷

雷雨湘江起卧龍
武陵樵客躡仙蹤
十年楚水楓林下
今夜初聞長樂鐘

無題

桃蹊柳陌好經過
燈下妝成月下歌
為是襄王故宮地
至今猶有細腰多

堤上行

酒旗相望大堤頭
堤下連檣堤上樓
日暮行人爭渡急
槳聲幽輒滿中流

其二

江南江北望煙波
入夜行人相應歌
桃葉傳情竹枝怨
水流無限月明多

楊州送客

南行直入鷓鴣羣萬歲橋邊一送君
聞道望鄉聽不得梅花暗落嶺頭雲

秋山

秋山無雲復無風溪頭看月出深松
草堂不閉石牀靜葉間墮露聲重重

寄府吏

野外尋花共作期今朝出郭不相隨
待君公事有閒日

此地春光應過時

石倉歷代詩選卷五十九

欽定四庫全書

石倉歷代詩選卷六十

明 曹學佺 編

中唐十四

王建
字仲初
潁州人

懷別

僕人驅行軒低昂出我門
離堂無留客席上唯琴樽
古道隨水曲悠悠繞荒村
遠程未奄息別念在朝昏
端居

愁歲永獨此留清景豈無經過人尋歎門巷靜君如天上雨我如屋下井無因同波流願作形與影

沈千運舊居

汝北君子宅我來見頽墉亂離子孫盡地屬隣里翁土木被丘墟蹊路不相通舊井蔓草合牛羊墜其中君辭天子書放意任體躬一生不自力家與逆旅同高議切星辰餘聲激瘖聾方將旌舊問百歲可封崇嗟其未積年已為荒林叢時豈無知音莫能敦此風

寄韓愈

野館非我室新居未能安讀書避塵雜方覺此地閒過
郭多園墟桑果相接連獨遊竟寂寞如寄空雲山夏景
晝常毒密林無鳴蟬臨溪一盥濯清去肢體煩出林望
層城君子在其間戎府草章記阻我此游盤憶昔西潭
時並持釣魚竿乍忻得魴鯉烹鱸于我前幾朝還復來
嘆息時獨言

傷于鵠

西山無逸人忽覺大國貧良玉沈幽泉名為天下珍野
性疎時俗再命乃從軍氣高終不合去如鏡上塵我初
有章句相合者惟君今來弔嗣子對隴燒斯文耕者廢
其耜爨者絕其薪筭無新衣裳曷用光我身莫回徒再
拜首意安能陳徒保金石韻千載人所聞

卧疾

身病始知道卧讀神農經空房夜留燈四壁青熒熒羈
旅逐人懼貧賤還自輕今來問良醫乃知病所生僮僕

各相憂杵臼無停聲見我形憔悴藥石語丁寧春雨枕
席冷窓前新禽鳴開門起無力遙愛雞犬行強顏進一
匕漸覺如酒醒方悟養生者不為憂患并

贈孟郊

歷歷天上星沈沈水中萍幸當清秋夜流影及微形君
生衰俗間立身如禮經淳意發高文獨有金石聲才名
振京國歸省東南行停車楚城下顧我不念程寶鏡曾
墮水不磨難自明苦節居貧賤所知賴友生惟會方別

離戚戚憂慮并安得在一方終老無送迎

夜懷

窮居積遠念轉轉迷所歸幽蕙零落色暗螢參差飛病
生秋風簾淚墮明月衣無愁坐寂寞重使奏清徽

野寺後池寄友

佛寺連野水池幽夏景清繁木蔭夫渠時有水禽鳴通
溪岸塹斷分渚流復縈伴僧鐘聲罷月來池上明友人
竟不至東北見高城獨游自寂寞况此恨盈盈

寄別者

寒天正飛蓬行人心切切同為萬里客中路忽離別別
君汾水東望君汾水西積雪無平岡空山無人蹊羸馬
時倚轅行行未遑食下車勸童僕相顧莫歎息詎知佳
期隔離念終無極

惜花

春潭足芳樹水清不如素幽人愛華景一一空山暮月
出潭氣白游魚暗衝石夜深春思多酒醒山寂寂

野居

貧賤易為適荒郊亦安居端坐無餘思彌樂古人書
秋田多良苗野水多遊魚我無耒與網安得充廩厨
寒天白日短簷下煖我軀四肢暫寬柔中腸鬱不舒
多病減志氣為客足憂虞況復時節晚覽物空踟躕

邯鄲主人

遠客無主人夜投邯鄲市飛蛾繞殘燭半夜人醉起
爐邊酒家女遺我絳綺被合成雙鳳花宛轉不相離
縱令

顏色改勿遣合懽異一念始為難萬金誰足貴門前長
安道去者如流水晨風羣鳥翔徘徊別離此

泛水曲

載酒入煙浦方舟泛綠波子酌我復飲子飲我還歌蓮
深微路通峯曲幽氣多閱芳無留瞬弄桂不停柯水上
秋日鮮西山碧我我茲懽良可貴誰復更來過

江南雜體

江上風脩脩竹間湘水流日夜桂花落行人去悠悠復

見離別處蟲聲陰雨秋

其二

處處江草綠行人發瀟湘瀟湘回鴈多日夜思故鄉春
夢不知數空山蘭蕙芳

七泉寺上方

長年好名山本性今得從回看塵蹟遙稍見麋鹿蹤老
僧雲中居石門青重重陰泉養成龜古壁飛却龍掃石
禮新經懸幡上高峯日夕猿鳥合覓食聽山鐘將火尋

遠泉煮茶傍寒松晚隨收藥人便宿南澗中晨起衝露
行濕花枝茸茸歸依向老衲願作無名翁

早發金堤驛

蟲聲四野盛月色滿城白家家閉戶眠行人發孤驛離
家尚苦熱衣服唯輕綌時節忽復遷秋風徹經脉人睡
落坑塹馬驚入蘆荻慰遠時問程驚昏忽搖策從軍豈
云樂憂患長縈積惟願在家貧團圓過朝夕

喻時

金剛經
卷六十一
去者如敝帷來者如新衣鮮華非久長色落還棄遺詎
知行者天豈悟壯者衰區區未死間回面相是非好聞
苦不樂好視忽生疵乃明萬物情皆逐人心移古今盡
如此達士將何為

將歸故山留別杜侍御

有川不得涉有路不得行沈沈百憂中一日如一生錯
來干諸侯石田廢春耕交戟衛重門何因達中誠日月
俱照耀山川異陰晴如何百里間開目不見明我今歸

故山誓與草木并願君削丘坂長使道路平

幽州送申稷評事歸平盧

行子繞天北山高塞復深升堂展客禮臨水濯纓襟驅
馳戎地馬聚散林間禽一杯瀉東流各願無異心薊亭
雖苦寒春夕勿重余從軍任白首莫賣故山岑

溫門山

早入溫門山羣峰亂如戟崩崖欲相觸呀豁斷行迹脫
屐尋淺流定足畏欹石路盡十里溪地多千歲栢洞門

晝陰黝深處惟石壁似見丹砂光亦聞鍾乳滴靈池出
山底池水衝地脉暖氣成濕煙濛濛窓下白隨僧入古
寺便成雲外客月出天氣涼夜鐘山寂寂

曉思

春條露霏霏曉氣生綠水林間栖鳥散遠念征人起幽
花宿含彩早蝶弄寒翅君行非晨風詎能從門至

早起

回燈正衣裳出戶星未稀堂前候姑起環珮生晨輝暗

池光晁歷密樹花葳蕤九城鐘漏絕遙聽直郎歸

涼州行

涼州四邊沙皓皓漢家無人開舊道邊頭州縣盡胡兵
將軍別築防秋城萬里人家皆已沒年年旌節發西京
多來中國收婦女一半生男為漢語蕃人舊日不耕犁
相學如今種禾黍驅羊亦著錦為衣為惜羶裘防鬪時
養蠶綠蠶成匹帛那能繞帳作旌旗城頭山雞鳴角角
洛陽家家學胡樂

寒食行

寒食家家出古城老人看屋少人行丘壠年年無舊道
車徒散行入衰草牧羊驅牛下塚頭見有家人來灑掃
遠人無墳水頭祭還引婦姑望鄉拜三日無火燒紙錢
紙錢那得到黃泉但看壠上無新土此中白骨應無主

促刺詞

促刺復促刺水中無魚山無石少年雖嫁不將歸頭白
猶著父母衣四邊田宅非所有我身不及逐雞飛出門

若有歸死處猛虎當衢向前去百年不遺踏君門在家
誰喚為新婦豈不見他隣舍娘嫁來常在舅姑傍

壠頭水

壠水何年壠頭別不在山中亦鳴咽征人塞耳馬不行
未到壠頭聞水聲謂是西流入蒲海還聞北去繞龍城
壠東壠西多屈曲野麋飲水長簇簇胡兵夜回水傍住
憶著來時磨劍處向前無井復無泉放馬回看壠頭樹

北印行

北邙山頭少閒土盡是洛陽人舊墓舊墓人家歸葬多
堆著黃金無買處天涯悠悠葬日促岡坂崎嶇不停轍
高張素幙繞銘旌夜唱挽歌山下宿洛陽城北復城東
魂車祖馬長相逢車轍廣若長安路蒿草少於松柏樹
澗底盤陀石漸稀盡向墳前作羊虎誰家古碑文字滅
後人重取書年月朝朝車馬送葬回還起大宅與高臺

溫泉宮行

十月一日天子來青繩御路無塵埃宮前內裏湯各別

每箇白玉芙蓉開朝元閣向山上起城繞青山龍暖水
夜開金殿看星河宮女知更月明裏武皇得仙王母去
山雞晝鳴宮中樹溫泉決決出宮流宮使年年修玉樓
禁兵去盡無射獵日西麋鹿登城頭梨園弟子偷曲譜
頭白人間教歌舞

春詞

紅煙滿戶日照梁天絲軟弱蟲飛揚菱花霍霍繞帷光
美人對鏡著衣裳庭中並種相思樹夜夜還棲雙鳳凰

遼東行

遼東萬里遼水曲古戍無城復無屋黃雲蓋地雪作山
不惜黃金賁衣服戰迴各自收弓箭正西回面家鄉遠
年年郡縣送征人將與遼東作丘坂寧為草木鄉中生
有身不向遼東行

塞上梅

天山路傍一株梅年年花發黃雲下昭君已歿漢使返
前後征人惟繫馬日夜風吹滿壠頭還隨壠水東西流

此花若近長安路九衢年少無攀處

賽神曲

男抱琵琶女作舞主人再拜聽神語
新婦上酒勿辭勤使爾舅姑無所苦
椒漿湛湛桂座新一雙長箭繫紅巾
但願牛羊滿家宅十月報賽南山神
青天無風水復碧龍馬上鞍牛服輓
紛紛醉舞踏衣裳把酒路傍勸行客

田家留客

人客少能留我屋客有新漿馬有粟
遠行僮僕應苦饑

新婦厨中炊欲熟不嫌田家破門戶蠶房新泥無風土
行人但飲莫畏貧明府上來何苦辛丁寧回語屋中妻
有客勿令兒夜啼雙塚直西有縣路我教丁男送君去

老婦嘆鏡

嫁時明鏡老猶在黃金鏤畫雙鳳背憶昔咸陽初買來
燈前自繡芙蓉帶十年不開一片鐵長向暗中梳白髮
今日後牀重照看生死終當此長別

望夫石

望夫處江悠悠化為石不回頭山頭日日風復雨行人
歸來石應語

烏樓曲

章華宮人夜上樓君王望月西山頭夜深宮殿門不鎖
白露滿山山葉墮

白紵歌

天河漫漫北斗璨宮中烏啼知夜半新縫白紵舞衣成
來遲邀得吳王迎低鬟轉面掩雙袖玉釵浮動秋風生

酒多夜長夜未曉月明燈光兩相照後庭歌聲更窈窕
飲馬長城窟

長城窟長城窟邊多馬骨古來此地無井泉賴得秦家
築城卒征人飲馬愁不回長城變作望鄉堆蹄蹤未乾
人去近續後馬來泥污盡枕弓睡著待水生不見陰山
在前陣馬蹄足脫裝馬頭健兒戰死誰封侯

烏夜啼

庭樹烏爾何不向別處棲夜夜夜半當戶啼家人把燭

出洞戶驚樓失羣飛落樹一飛直欲飛上天回回不離
舊樓處未明重繞主人屋欲下空中黑相觸風飄雨濕
亦不移君家樹頭多好枝

空城雀

空城雀何不飛來人家住空城無人種禾黍土間生子
草間長滿城蓬蒿幸無主近村雖有高樹枝雨中無食
長苦饑八月小兒挾弓箭家家畏向田頭飛但能不出
空城裏秋來百草皆有子報言黃口莫啾啾爾得長成

無橫死

贈離曲

合懽葉墮梧桐秋鴛鴦背飛水分流少年使我忽相棄
雌雄鳴夜悠悠夜長月沒蟲切切金風入房燈燭滅
若知中路各東西彼此不忘同心結收取頭邊蛟龍枕
留著箱中雙雉裳我今焚却舊房物免使他人登爾牀

田家行

男聲欣欣女顏悅人家不怨言語別五月雖熱黍風清

簷頭索索綠車鳴野蠶作繭人不取葉間撲撲秋蛾生
麥收上場絹在軸的知輸得官家足不望入口復上負
且免向城賣黃犢田家衣食無厚薄不見縣門身即樂
行見月

月初生居人見月一月行行行一年十二月強半馬上
看盈缺百年歡樂能幾何在家見少行見多不緣衣食
相驅遣此身誰願長奔波篋中有帛倉有粟豈向天涯
走碌碌家人見月望我歸正是道上思家時

七夕曲

河邊獨自看星宿
夜織天絲難接續
拋梭振躡動明璫
為有秋期眠不足
遙愁今夜河水隔
龍駕車轅鵲填石
流蘇翠帳星渚間
環珮無聲燈寂寂
兩情纏綿忽如故
復畏秋風生曉露
幸回郎意且斯須
一年中別今始初
明星未出少停車

寄遠曲

美人別來無處所
巫山月明湘江雨
千迴相見不分明

井底看星夢中語兩心相對尚難知何況萬里不相疑
荆門行

江邊行人暮悠悠山頭殊未見荊州峴亭西南路多曲
櫟林深深石鏤鏤看炊紅米煮白魚夜向雞鳴店家宿
南中三月蚊蚋生黃昏不聞人語聲生紗帷踈薄如霧
隔衣潛膚耳邊鳴欲明不待燈火起喚得官船過蠻水
女兒停客茅屋新開門掃地桐花裏犬聲撲撲寒溪煙
人家燒竹種山田已雲欲雨薰石熱麋鹿過江蟲出穴

大蛇過處一山腥野牛驚跳雙角折斜分漢水橫千山
山青水綠荆門關向前問箇長沙路舊是屈原沈溺處
誰家丹旌已南來逢著流人從此去月明山鳥多不飛
下枝飛上高枝啼主人念遠心不憚羅衫坐對章臺夕
紅燭交橫各自歸酒醒還是他鄉客壯年留滯尚思家
況復白頭在天涯

羽林行

長安惡少出名字樓下劫商樓上醉天明下直明光宮

散入五陵松柏中
百回殺人身合死
赦書尚有收成功
九衢一日消息定
鄉吏籍中重改姓
出來依舊屬羽林
立在殿前射飛禽

遠將歸

遠將歸勝未別離時
在家相見熟新婦
懽不足去願車輪
遲回思馬蹄速但
令在舍相對貧不
向天涯金遠身
開池得古釵

美人開池北亭下
拾得寶釵金未化
鳳凰半在雙股齊

鈿花落處生黃泥當時墮地覓不得暗想窓中還夜啼
可知將來對夫婿鏡前學梳古時髻莫言至死亦不遺
還似前人初得時

短歌行

人初生日初出上山遲下山疾百年三萬六千朝夜裏
分將強半日有歌有舞湏早為昨日健於今日時人家
見生男女好不知男女催人老短歌行無樂聲

當窓織

歎息復歎息園中有棗行人食貧家女為富家織翁母
隔牆不得力冰寒手澁絲脆斷續來續去心腸爛草蟲
促促機下啼兩日催成一匹半輸官上頭有零落姑未
得衣身不著當窓却羨青樓倡十指不動衣盈箱

失釵怨

貧女銅釵惜於玉失却來尋一日哭嫁時女伴與作妝
頭戴此釵如鳳凰雙杯行酒六親喜我家新婦宜拜堂
鏡中乍無失髻樣初起猶疑在牀上高樓翠鈿飄舞塵

明日從頭一遍新

主人故池

曲池高閣相連起荷葉團團蓋秋水主人已遠涼風生
舊客不來芙蓉死

神樹詞

我家家西老棠樹湏晴即晴雨即雨四時八節上杯盤
願神莫離神處所男不著丁女在舍事官上下無言語
老身長健樹婆娑萬歲千年作神主

銅雀臺

嬌愛更何日高臺空數層含啼暎雙袖不忍看西陵漳
水東流無復來百花輦路為蒼苔青樓月夜長寂寞碧
雲日暮空徘徊君不見鄴中萬事非昔時古人不在今
人悲春風不逐君王去草色年年舊宮路宮中歌舞已
浮雲空指行人往來處

秋閨

秋風窓下起旅雁又南飛日日出門望家家行客歸無

因見邊使空待寄寒衣獨閉青樓暮煙深鳥雀稀

汴路水驛

晚泊水邊驛柳塘初起風蛙鳴蒲葉下魚入稻花中去
舍已云遠問程猶向東近來多怨別不與少年同

淮南使回留別竇侍御

戀戀春恨結綿綿淮草深病身愁至夜遠道畏逢陰忽
逐酒杯會暫同風景心從今一分散還是曉枝禽

汴路即事

千里河煙直青槐夾岸長天涯同此路人語各殊芳草
市迎江貨津橋稅海商回看故宮柳憔悴不成行

醉後憶山中故人

花開草復秋雲水自悠悠因醉暫無事世間難免愁遇
晴須看月聞健且登樓暗想山中伴如今盡白頭

冬夜感懷

晚年恩愛少耳目靜於僧一夜不聞語空房惟有燈氣
虛寒被濕霜入破窓凝斷得人間事長如此亦能

原上新居

新占原頭地本無山可歸
荒藤生葉晚老杏著花稀
厨舍近泥竈家人初飽薇
弟兄今四散何日更相依

其二

雞鳴村舍遙花發亦蕭條
野竹初生筍溪田未得苗
家貧僮僕瘦春冷菜蔬焦
甘分長如此無名在聖朝

送李評事使蜀

勸酒不依巡明朝萬里人
轉江雲棧細近驛板橋新
石

冷啼猿影松昏戲鹿塵少年為客好況是益州春

新脩道居

世間無所入學道處新成兩面有山色六時聞磬聲聞
加經遍數老愛字分明若得離煩惱焚香過一生

昭應宮舍

繞廳春草合知道縣家閒行見雨遮院卧看人上山避
風新浴後請假未醒間朝客輕卑吏從他不往還

邊上送故人

百戰一身在相逢白髮生何時得家信每日算歸程走
馬登寒壠驅羊入廢城羌歌三兩曲人醉海西營

杜中丞書院新移小竹

此地本無竹遠從山寺移經年求養法隔日記澆時嫩
綠卷新葉殘黃收故枝色經寒不動聲與靜相宜愛護
出常數稀稠看自知貧家緣未有客散獨行遲

江陵即事

瘴雲梅雨不成泥十里津頭壓大堤蜀女下沙迎水客

巴童傍驛賣山雞寺多紅藥燒人眼地足青苔染馬蹄
夜半獨眠愁在遠北看歸路隔蠻溪

華清感舊

塵到朝元邊使急千官夜發六龍迴輦前月照羅衫淚
馬上風吹鵲燭灰公主妝樓金鎖澁貴妃湯殿玉蓮開
有時雲外聞天樂知是先皇沐浴來

題金家竹溪

少年因病離天仗乞得歸家自養身買斷竹溪無別主

分散泉水與新隣山頭鹿下長驚犬池面魚行不怕人
鄉使到來常款語還聞世上有功臣

題應聖觀

精思堂上畫三身迴作仙官度美人賜額御書金字貴
行香天樂羽衣新空廊鳥啄花輒縫小殿蟲緣玉像塵
頭白女冠猶說得薔薇不似已前春

同于汝錫遊降聖觀

秦時桃樹滿山坡騎鹿先生降大羅路盡溪頭逢地少

門連內裏見天多
荒泉壞簡朱砂暗
古塔殘經篆字訛
聞說開元齋醮日
曉移行漏帝親過

早登西禪寺閣

上方臺殿第三層
朝壁紅窓日氣凝
煙霧開時分遠寺
山川晴處見崇陵
沙灣漾水圖新粉
綠野荒阡暈色繒
莫說城南月燈閣
自諸樓看總難勝

題江寺兼求藥子

隋朝舊寺楚江頭
深謝師僧引客遊
空賞野花無過夜

若看琪樹即須秋紅珠落地求誰與青角垂階自不收
願乞野人三兩粒歸家將助小庭幽

寄舊山僧

因依老宿發心初半學修心半讀書雪後每常同席卧
花時未省兩山居獵人箭底求傷雁釣戶竿頭乞活魚
一向風塵厭煩惱不知衰病日難除

晚秋病中

萬事風吹過耳輪貧兒活計亦曾聞偶逢新語書紅葉

難得閒人語白雲霜下野花渾著地寒來溪鳥不成羣
病多骨痛無心力更被頭邊藥氣薰

故梁國公主池亭

平陽池館枕秦川門鎖南山一朵煙素柰花開西子面
綠榆枝散沈郎錢裝簷玳瑁隨風落傍岸鷓鴣逐暖眠
寂寞空餘歌舞地玉簫聲絕鳳歸天

聞說

桃花百葉不成春鵲壽千年也未神秦隴州緣鸚鵡貴

王侯家為牡丹貧歌頭舞遍迴迴別鬢樣眉分日日新
鼓動六街騎馬出相逢總是學狂人

長安早春

霏霏漠漠遶皇州銷雪欺寒不自由先向紅妝添曉夢
爭來白髮送新愁暖催衣上縫羅勝晴報窓中點綵毬
每度暗來還暗去年年空遣蝶蜂留

上陽宮

上陽花木不曾秋洛水穿宮處處流畫閣紅樓宮女笑

玉簫金管路人愁
幔城入澗橙花發
玉輦登山桂葉稠
曾讀列仙王母傳
九天那勝此中遊

秋燈

向壁暖悠悠
羅幃寒寂寂
斜照碧山圖
松間一片石

落葉

陳綠向參差
初紅已重疊
中庭初掃地
繞樹三兩葉

野菊

晚艷出荒籬
冷香著秋水
憶向山中見
伴蛩石壁裏

南澗

野桂香滿溪石莎寒覆水愛此南澗頭終日潺湲裏

新嫁娘

三日入厨下洗手作羹湯未諳姑食性先遣小姑嘗

故行宮

寥落古行宮宮花寂寞紅白頭宮女在閒坐說玄宗

早發汾南

橋上車馬發橋南烟樹開青山斜不斷迢遞故鄉來

長門燭

秋夜牀前醵燭微
銅壺滴盡曉鐘遲
殘光欲滅還吹起
年少宮人未睡時

過綺岫宮

玉樓傾倒粉牆空
重疊青山遶故宮
武帝去來羅袖盡
野花黃蝶領春風

宮前早春

酒慢高樓一百家
宮前楊柳寺前花
內園分得溫湯水

二月中旬已進瓜

舊宮人

先帝舊宮宮女在亂絲猶挂鳳凰釵霓裳曲譜揮拋却
獨自花間掃玉堦

寄蜀中薛濤校書

萬里橋邊女校書枇杷花裏閉門居掃眉才子于今少
管領春風總不如

十五夜望月寄杜郎中時會琴客

夜市千燈照碧雲，高樓紅袖客紛紛。
如今不似時平日，猶自笙歌徹曉聞。

送顧非熊秀才歸丹陽

江城柳色海門煙，欲到茅山始下船。
知道君家當瀑布，菖蒲潭在草堂前。

唐昌觀玉蘂花

一樹籠鬆玉刻成，飄廊點地色輕輕。
女冠夜覓香來處，唯見堦前碎月明。

九日登叢臺

平原池閣在誰家
雙塔叢臺野菊花
零落故宮無入處
西來澗水繞城斜

江陵使至汝州

迴看巴路在雲間
寒食離家麥熟還
日暮數峰青似染
商人說是汝州山

十五夜望月

中庭地白樹棲鴉
冷露無聲濕桂花
今夜月明人盡望

不知秋思在誰家

宮詞

百首中
選出者

蓬萊正殿壓金鰲紅日初生碧海濤
閒着五門遙北望
柘黃新帕御牀高

龍煙日暖紫瞳瞳宣政門當玉殿風
五刻閣前卿相出
下簾聲在半天中

千牛仗下放朝初玉案傍邊立起居
每日進來金鳳紙
殿頭無事不多書

延英引對碧衣郎江硯宣毫各別牀天子下簾親考試
宮人手裏過茶湯

羅衫葉葉繡重重金鳳銀鵝各一叢每遍舞時分兩向
太平萬歲字當中

魚藻宮中鎖翠娥先皇行處不曾過如今池底休鋪錦
菱角雞頭積漸多

新秋白兔大如拳紅耳霜毛趁草眠天子不教人射殺
玉鞭遮到馬蹄前

鸚鵡誰教轉舌關
內人手裏養來艱
語多更覺承恩澤
數對君王憶隴山

教遍宮娥唱遍詞
暗中頭白沒人知
樓中日日歌聲好
不問從初學阿誰

金殿當頭紫閣重
仙人掌上玉芙蓉
太平天子朝元日
五色雲中駕六龍

殿前傳點各依班
召對西來入詔蠻
上得青花龍尾道
側身偷覲正南山

內人對御疊花牋繡坐移來玉案邊紅蠟光中呈草本
平明昇出閣門宣

樓前立仗看宣赦萬歲聲長再拜齊日照移盤高百尺
飛仙爭上取金雞

祕殿清齋刻漏長紫微宮女夜焚香拜陵日近公卿發
鹵簿分頭入太常

新調白馬怕鞭聲供奉騎來遶殿行為報諸王侵早入
隔門催進打毬名

殿前明日中和節連夜瓊林散舞衣傳報所司分蠟燭
監門金鎖放人歸

五更五點索金車盡放宮人出看花仗下一時催立馬
殿前先報內園家

城東北面望雲樓半下珠簾半上鉤騎馬行人長遠過
恐防天子在樓頭

競渡船頭掉綵旗兩邊濺水濕羅衣池東爭向池西岸
先到先書上字歸

燈前飛入玉階蟲未卧常聞半夜鐘
看著中元齋日到
自盤金線繡真容

紅燈睡裏喚春雲雲上三更直宿分金砌
雨來行步滑
兩人擡起隱花裙

一時起立吹簫管得寵人來滿殿迎
整頓衣裳皆著却
舞頭當拍第三聲

琵琶先抹六么頭小管丁寧側調愁
半夜美人雙唱起
一聲聲出鳳凰樓

春池日暖少風波
花裏牽船水上歌
遙索劍南新樣錦
東宮先釣得魚多

十三初學擘箏篋
弟子名中被點留
昨日教坊新進入
並房宮女與梳頭

紅蠻捍撥貼胸前
移坐當頭近御筵
用力獨彈金殿響
鳳凰飛下四條絃

春風吹雨洒旗竿
得出深宮不怕寒
誇道自家能走馬
園中橫過覓人看

雲駝花驄各試行一般毛色一般纓殿前來往重騎過
欲得君王別賜名

每夜停燈熨御衣銀燠籠底火霏霏遙聽帳裏君王覺
上直鐘聲始得歸

欲迎天子看花去下得金堦却悔行恐見失恩人舊院
回來憶著五絃聲

自誇歌舞勝諸人恨未承恩出內頻連夜宮中修別院
地衣簾額一時新

合暗報來門鎖了夜深應別喚笙歌房房下著珠簾睡
月過金堦白露多

御厨不食索時新每見花開即苦春白日卧多嬌似病
隔簾教喚女醫人

新晴草色綠溫暾山雪初消漸水渾今日踏青歸校晚
傳聲留著望春門

新樓兩換珠簾額中尉明朝設內家一樣金盤五千面
紅蘇點出牡丹花

別勅教歌不出房一聲一遍奏君王再三博士留殘拍
索向宣徽作徹章

私縫黃帔捨釵梳欲得金仙觀內居近被君王知識字
收來案上簡文書

行中第一爭先舞博士傍邊亦被欺忽覺管絃偷破拍
急翻羅袖不教知

日冷天晴近臘時玉堦金瓦雪淅淅浴堂門外抄名入
公主家人謝面脂

未承恩澤一家愁乍到宮中憶外頭求守管絃聲款逐
側商調裏唱伊州

東風潑火雨新休舛盡春泥掃雪溝走馬犢車當御路
漢陽公主進雞裘

風簾水閣壓芙蓉四面鈎簾在水中避熱不歸金殿宿
秋河織女夜妝紅

避暑昭陽不擲盧井邊含水噴雞雛內中數日無呼喚
榻得滕王蛺蝶圖

內人相續報花開
准擬君王便看來
逢著五絃琴繡袋
宜春院裏按歌回

不隨阿妹學吹笙
見好君王賜與名
夜拂玉牀朝把鏡
黃金殿外不教行

宮花不共外花同
正月長先一半紅
供御櫻桃看守別
直無鴟鵂到園中


太儀前日暖房來
囑向朝陽乞藥栽
勅賜一窠紅躑躅
謝恩未了奏花開

御前新賜紫羅襦步步金階上軟輿宮局總來為喜樂
院中新拜內尚書

春風院院落花堆金鎖生衣掣不開更築歌臺起妝殿
明朝先進畫圖來

舞來汗濕羅衣徹樓上人扶下玉梯歸到院中重洗面
金盆水裏潑銀泥

牕牕戶戶院相當總有珠簾玳瑁牀誰道君王不來宿
帳中長是炷牙香



石倉歷代詩選卷六十